

欽定大清會典事例

欽定大清會典事例卷二百三十九

戶部

關稅禁令一

禁令○順治九年題准各關差不許留用保家委官等項名色。其額設巡攔各製號衣腰牌以杜冒充。○十年題准令各關差刊示定例設櫃收稅不得勒扣火耗需索陋規並禁關役包攬報單。○十一年覆准各關納銀數多給票數少者許商民首告議處。○十三年題准過關船如有指稱內外官及旗下人夾帶私貨者該關官

查明分別叅辦。○又奏准各關當堂設櫃設梁頭貨物條例。商民親自填簿輸銀投櫃。驗明放行。隱漏者治罪。如有濫委差役苛索民間小船往來衣服食物者。該撫查實叅處。○十四年題准關稅照部頒條例刊榜。豎立關口。便商輸納。○康熙二年題准外國人帶進貨物。崇文門不必收稅。○四年題准各關不許復用舊役。○五年題准嗣後崇文門貨物出門者免稅。○八年議准各關刊榜。除去鈔貫字樣。明載徵銀數目。收稅單一様填寫三紙。一留商人。一送部查覈。

○九年題准各關召募書吏不許舊役更名復  
充○十一年題准裁各關典史攢典○十八年

諭各關額外橫徵差役四出擾害商民者該部嚴禁訪

叅○二十三年覆准福建廣東兩省許用載五百石

以下船出海貿易地方官登記人數船頭烙號

給發印票令防守海口官弁驗票放行撥船巡

哨如有雙桅八槳載五百石以上大船出洋夾

帶禁物及文武官弁藉端需索者皆從重治罪

其進海口內橋津地方貿易舟車等物停止徵

稅○二十四年議准江浙二省亦許出海貿易

其禁例與閩廣同。○又覆准福建省沿海無蓬桅捕魚船稅仍聽地方官徵收。其有蓬桅船聽監督照例徵收梁頭稅課沿海要口均撥哨船衙役巡查。○二十五年議准州縣官隱匿海口之船至五船者罰俸六月。十船以下罰俸一年。十五船以下降一級留任。二十船以下降一級調用。二十五船以下降二級調用。三十船以下降三級調用。三十船以上革職仍計所隱之船應徵稅銀照數賠補。○又

諭橋道渡口處所概行收稅於朕恤商之意不符著九

卿詹事科道會議具奏。欽此。遵

旨議定。止收出海入海船稅。進口內橋津地方貿易船車等物。仍停其徵收。○二十八年

諭採捕魚蝦船及民間日用之物。並餉口貿易。悉免其收稅。○三十二年覆准。設關原以通商便民。近多違例濫徵。甚至小河小港。以及近關之地。旱路均行攔截。擔負之民。盡行檢索。嗣後令各該督撫。不時訪叅。如別經發覺。將該督撫一併處分。○三十三年覆准。各關監督所給商人印單。不許撤回。如有撤回多徵等弊。該撫題叅議處。○三

十六年議准。關差赴任。均照各衙門事例。聽舊官籤點。經制書吏。如有自京私帶積蠹。及年滿復充舊役。謀占總科庫頭名色者。嚴加議處。○五十年覆准。閩廣江西等省客商。從長江直下蘇松者。不許出鼈子門。令赴北關納稅。蘇松等處客商往閩廣者。任其行走。若從海關。敢浦納稅。過鼈子門。從長江行走。北新關不收稅。如姦商偷過應行之路。被獲治罪。○五十二年議准。嗣後出差官攜家口赴任。與不酌量關口足用。多帶家人。及任滿回京。不照題定兩月限內具

呈考覈擅買田宅者發覺之日交與該部治罪。至衙役除解餉公事仍赴京長接監督在任買優置妾及以缺額藉口題請展限者皆交部治罪。○五十三年題准湖廣桂陽等四縣行銷引鹽蠹蠹串通太平關椎蠹阻留勒索又太平關統轄三關每過關船勒索單銀橋錢行令督撫嚴行禁止。○五十五年議准瓜洲稅課司每年額徵稅銀向徵貿易小民此後停其徵收令揚州府同知代為捐解並造入該同知經徵由牘額稅內別款清解如該同知再於商民私徵該



撫卽行題。參其稅課大使。既無徵收之責。卽令  
裁去。○雍正元年

諭各關差除正額錢糧外。加增贏餘銀。作何減除之處。  
該部酌議具奏。欽此。遵

旨議定。將淮安。北新。南新。鳳陽。天津。臨清。江。海。浙。海。荆  
州等九關。加增贏餘銀。悉行裁去。○二年

諭國家之設關稅。所以通商而非累商。所以便民而非  
病民也。朕撫御寰區。加惠黎庶。惟恐民隱不能上達。  
近聞權關者。往往寄耳目於胥役。不實驗客貨之多  
寡。而止憑胥役之報單。胥役於中。未免高下其手。任

意勒索。飽其欲者。雖貨多稅重。而蒙蔽不報者有之。或從輕報者有之。不遂其欲。雖貨少稅輕。而停滯關口。至數日不得過。是以國家之額稅。聽猾吏之侵漁。以小民之脂膏。飽姦胥之谿壑。司其事者。竟若罔聞。又聞放關。或有一日止一次者。江濤險急。河路窄隘。停舟候關。於商民亦甚不便。嗣後榷關者。務須秉公除弊。過關之船。隨到隨驗。應收稅者。納稅即放。不得任胥役作姦勒索阻滯。以副朕通商便民之意。至於崇文門收稅。及分委各口收稅之人。亦有多方勒索。分外苛求之弊。京師為四方輻輳之地。行李絡繹。豈

宜苛刻滋擾。監收者尤當不時稽察。杜絕弊端。各省關差若不遵諭旨。經朕訪聞。定從重治罪。○又

諭。凡商賈貿易之人。往來關津。宜加恩恤。故將關差歸

之巡撫。以巡撫為封疆大吏。必能仰承德意。加惠商旅也。但各關皆有遠處口岸。所委看管之家。人賢愚不一。難免額外苛求及索取飯錢等弊。稍不如意。則縛送有司。有司礙巡撫之面。徇情枉法。則商民無所控訴矣。嗣後著將應上稅課之貨物。遵照條例。逐件刊刻詳單。印刷多張。各貨店均給一紙。使眾人知悉。其關上所有刊刻條例之木榜。務令豎立街市。使人

人共見不得隱匿屋內。或用他紙掩蓋。以便高下其手。任意苛索。立法如此。自能剔除弊端。各省兼管關稅之巡撫。受朕委任之重。尤當仰體朕心。遴選誠實可信之人。以任稽察之責。必期商民有益。方為稱職。

○又議准崇文門查驗緞紗等物。令該商將各物丈尺報明。隨手抽一二尺驗看。若以多報少。將該商照例治罪。○五年覆准。許墅關豆稅。舊例丈八梁頭。納銀六十七兩三錢。小販每石七分。近來丈八梁頭。有改造深寬者。令循例箴量。多者依數。每石二分六釐。遞加。其過船倉限槽。

餘豆亦每石二分六釐。小販改每石四分。○又  
題准糧船於裝卸馬頭產貨地方。令押運官及  
沿途催運文武官弁親身查驗。如有不法姦丁  
舵工水手人等。沿途停泊攬載多貨。立即申報  
題叅將運丁照漏稅例治罪。貨物入官。拏獲之  
兵役量加賞給。如有明知故縱及漫無覺察者。  
將該管運弁並地方官。皆嚴加議處。○又奏准  
各商船戶。不許私走支河。務須直赴關口。按例  
輸課。如有包送漏稅及隨帶軍器恃眾拒捕等  
弊。姦徒姦商船戶。按律究治。地方官議處。至於

近關土豪或係無賴或係革役成羣冒充巡攔  
撐駕白船橫截汊港要路攔阻鄉民柴米食用  
器具不應納稅之物勒索銀錢者許監督地方  
官弁協拏究治○又奏准回空糧船許帶土宜  
六十擔免其輸稅伊等勢必將貨分散各船侵  
欺稅課嗣後回空糧船所載梨棗等物仍令輸  
稅○又奏准許墅關嗣後徵收大梁頭船裝載  
豆貨活梁頭船裝載米貨均令籤量計石收銀  
四分其紬緞每擔輸稅銀二錢六分以七十五  
斤為一擔布每擔輸稅銀二錢五分以百二十

疋為一擔。桐油一擔。輸稅銀一錢二分。至各色貨各樣船。應徵條例。並令刊刻木榜。曉諭商民。其各關徵收稅銀。亦令各關監督。將各處現行徵收條例。據實陳奏。刊榜曉諭。毋得陽奉陰違。儻經接任官查出。從重治罪。○又題准。臨清關徵收米麥稅銀。照浙墅關之例。籤量計石。每擔納銀二分二釐。雜糧照原額。每擔一分一釐。船戶應納正糧。仍照舊徵輸。○六年覆准。民間耕馱需用騾馬匹。往歸化城換買。准由殺虎口經過納稅。如有違例禁阻。即行題參。○七年

諭各關開放商船向例有部頒號簿近聞各關別設私簿徵收惟於報部之時始將號簿挨日填造其意以水路船往來多寡不齊若據實填簿則不能逐日有徵收數目恐干部駁是以設法勻派填造如此則簿內全非實在數目與商船過稅串票毫不相符殊非政體且凡事據實則可以無弊作偽則弊竇叢生今既任意勻派填造則號簿亦為虛設矣嗣後各關於部頒號簿務須據實填寫儻無船過稅之日亦即註明不得仍蹈前轍如敢故違定嚴加議處該部亦不得濫行指駁致滋弊端○又奏准浙省南北兩關及



浙海關稅徵收稅銀事宜均令刊立木榜以便商旅其嘉湖兩府南糧並民間完納漕糧租米等項進關原非商販其船稅一概免徵○又奏准鳳陽關所轄之正陽關商船以豫斛三百石為滿料關下裝船以五百石為滿料多餘者為加倉不足梁頭者為小販光州雜貨以擔計稅菴蓬竹木以件計稅臨淮長淮照梁頭例盱眙等本處裝載照關下例臨淮梔封船鈔每丈納銀二兩二錢每增減一尺各增減稅銀三分並令將各口條例刊榜曉示○又覆准各省解送

官銅及辦公一切物料到關到廠查與本省批  
文數目相符免其權課。儻有多帶俱令按例輸  
稅。○又覆准崇文門乃五方輻輳之地商販多  
於外省凡有貨到而本客未至者令店鋪代報  
納課。儻有不肖店鋪漏課指商按例究治。○八  
年題准天津關向來收稅一兩加戥耗一分八  
釐。船料一兩加戥耗五分八釐。著永行禁革。○  
又題准嗣後有黃金販賣出洋者照鐵貨銅錢  
等物私出外境下海律治罪。其監督守口文武  
官弁受賄故縱與犯人同罪。失察者照律叅處。

○又題准採捕魚船夾帶米穀皆由私牙代買  
圍戶豫積小船搬運停泊游移之故嗣後米牙  
必擇身家殷實取鄰甲同行保結如串商代買  
本人並濫保者一例治罪其海口居民多行囤  
積私糶者鄰甲舉首免罪止究本人容隱發覺  
並行連坐外來船均令進口停泊其各澳小船  
令地方官按數查明編號入冊取具互結令各  
營縣汛口官弁兵役實力稽查如有盤出私米  
及首報者准其賞給十分之三在洋拏獲者給  
半餘入官充公仍飭巡查兵役不得將海口居

民食米指稱私積詐害違者按律治罪○又題  
准福建沿海各屬給照通糴米穀令各營縣官  
弁查驗照內買米地方准其買足即於照內註  
明數目移知原籍查對如逾地偷買者拏究該  
地方官弁或故縱奉行不力者指名題參○九  
年題准山海關之西北石門寨等處梨稅准其  
每包減稅一半止納三分以恤窮民將各稅徵  
收火耗酌定以每兩扣耗二錢其二錢二分者  
減去二分二錢五分者減去五分○又議准廢  
鐵潛入邊境及海洋販賣者一百斤以下杖一

百徒三年一百斤以上。發邊衛充軍。若賣與外國。及明知海寇賣與者。絞監候。沿口近邊關隘官舟。有徇私故縱。該管上司題參。○又定鐵鍋出洋。照廢鐵之例一體嚴禁。○十年議准徵收商稅條例。令管關者刊刻散給。未免隱匿。由己應行令各督撫轉飭附近關口之地方官。將題定現行條例。刊刷小本。頒發各行戶散賣。每本定價銀二分。以為刊刷之資。仍委官不時訪察。如各關木榜。有黏貼掩蓋。及書役苛索等弊。即詳報上司題參。至地方官刊發條例。有不詳晰。

校定遺漏錯誤或扶同徇隱者一併叅處○十

二年

諭直省關稅監督於地方官原不相統轄一切呼應不  
靈而大小口岸甚多監督一人勢難分身兼顧雖選  
委書吏巡役公同親信家人稽查收放而地方文武  
官弁以為無與己事並不協力或轉挾私則姦商之  
隱漏土豪之把持督撫或不關心監督動則掣肘不  
獨於稅務無補即於地方亦難免擾累嗣後凡有監  
督各關著該督撫監管所屬口岸飭令該地方文武  
各官不時巡查如有縱容滋擾情弊聽督撫叅處至

監督徵收稅課。及凡應行事宜。仍照舊例遵行。不必聽督撫節制。如此既有專司。仍無敢歧視於稅課商民。似均有裨益。○十三年

諭聞江南淮安板牘地方。有土豪人等。開立寫船包載等行。由該縣濫請司帖。合夥朋充。為客商之擾累。曾經該關差追帖禁止。而土豪等仍改易姓名。盤踞淮關上下。凡有南河北河。西河三路。豆米貨船。內有重載。在於關口雇覓小船起剝者。輒恃強代雇。任意勒索使用。不饜不休。客商甚為苦累。每致觀望不前。朕得之傳聞者。著該督撫再行確查。儻果有此等情弊。

即嚴懲禁止。毋得視為具文。嗣後布政使司衙門亦不得濫給牙帖。若他處關口有似此作弊者。著該督撫一例查禁。○又題准山東青白二豆。素資江省民食。雖不在例禁之內。但沿海載運商船出入。理宜設法稽查。以杜偷賣。應令山東海口各州縣衛。設立兩聯印票。凡有豆船出口。將商客船戶年貌籍貫。本船字號。梁頭尺寸。二豆數目。出口月日。逐一填註票內。一給商船。一留該處存查。該船到次。由海關進口上稅者。該關驗明人船豆數相符。即於來票內填明到口日期。鈐用關



印仍將船票交商進口。俟賣完回東呈送原給衙門驗票查銷。其由劉河收口者亦令該關別設豆船印票發存口岸。俟豆船進口上稅之時即將印票驗填進口日期將山東來票截角一併交與本商回東呈繳。其有江南客商在東買豆回省者亦由山東給予印票俟回省將票繳存關口一月彙移覈銷仍令山東州縣衙每月將給過豆船票號造冊申請咨送江南稽察江南關口亦將每月到關驗過豆數造冊申齋咨送山東較對至前次已經出口之船於下次出

口船票內令山東各州縣衛照數開載。聽江南海關體察前船曾否到省。如有未到。即關會確查。嗣後山東豆船。僅無印票而載運出口。及有匿票私賣。並與原票不符之處。一經查出。根究明確。將無印票而載運出口。及匿票私賣者。船豆皆入官。販豆人等。照偷運米穀出洋例治罪。其與原票不符者。果有私賣外洋情事。將船豆亦皆入官。販豆人等。亦照偷運米穀出洋例治罪。如無私賣外洋情事。或因出口之時。二豆數目未經覈准。有與原數短少無多者。將販豆之

人。照違

制律杖一百。船豆免其入官。如該管官不行詳查。致有偷漏私越。照失察偷運米穀出洋例。罰俸一年。○又議准各關將徵收稅條刊書大字。立於關口。不得書寫小字。懸立僻處。違者該督撫題叅。又近關前後數里內。有設巡役者。悉行革除。以安商旅。○又議准各省督撫兼管關口。於委員之外。又派家人巡查關務。應令所委管關之員。不時查察。毋任該家人等苛索侵漁。又各關巡役。每於商賈未行納稅之時。先索飯錢。應通

行嚴禁。至近關前後濫設之役，悉令撤除。違者  
參劾治罪。○又覆准嗣後貨船到關，即令商人  
將貨物艙口據實開具清單，赴關查驗。果無遺  
漏，算明稅銀，填具單簿，將單給商收執。每日早  
晚兩次放關，隨即驗單截角。再於單尾填明到  
關放關時日，以便稽查。○又議准甯古塔地方  
商人換得貂皮等物，報明該處大臣回來起票  
時，俱填入票內。所過關口，查驗課稅。如不報明  
偷藏越過，查出從重治罪。物件入官。○乾隆元

年

諭朕聞外洋紅毛夾板船到廣時泊於黃埔地方起其

所帶礮位然後交易俟交易事竣再行給還至輸稅之法每船按梁頭徵銀二千兩左右再照則徵其貨物之稅此向來之例也乃近來夷人所帶之礮聽其安放船中而於額稅之外將所攜置貨現銀別徵加一之稅名曰繳送亦與舊例不符朕思從前洋船到廣既有起礮之例此時仍當遵行何得改易至於加增繳送稅銀尤非朕加惠遠人之意著該督查照舊例按數裁減並將朕旨宣諭各夷人知之○又議准嗣後如有姦徒偷運米穀接濟外洋者照出洋

船隻多帶米糧接濟外洋例擬絞立決。其有希圖厚利。但將米穀偷運出口販賣。並無接濟姦匪情弊者。計算米一百石以上。穀二百石以上。照將鐵貨潛出海洋貨賣一百斤以上例。發邊衛充軍。米一百石以下。穀二百石以下。照越渡關津律。杖一百。徒三年。至米不及十石。穀不及二十石。照違

制律。杖一百。仍枷號一月。示儆為從。及船戶知情者。各減一等。米穀船隻照例變價入官。其在內地河港販運接濟民食。並不出口過海者。不在違

禁之例地方官弁不得藉詞攔阻至偷運米穀  
出口及在洋接濟姦匪該管之文武各官除知  
情故縱仍照違禁貨物出口律治罪外如失察  
偷運米一百石以上穀二百石以上將各員弁  
均降一級留任米一百石以下穀二百石以下  
罰俸一年米不及十石穀不及二十石者罰俸  
六月○又覆准邊海居民採捕魚蝦單桅船隻  
概免納稅如有違例徵收即行題參○二年奏  
准殺虎口肩擔背負攜帶箕筐茗帚鞋襪麥麵  
等物免其輸稅其興販積成車馱捆擔者仍照

例輸納。○又覆准各省米穀稅例。龍江。西新。山海。贛。殺虎口。張家口。閩海。江海。太平。南新。廟灣。成都府等處。皆稱向來並不徵收米穀之稅。崇文門。打箭鑪。與揚州之滕壩。均收酒米之稅。其餘豆麥雜糧。概不徵收。均應遵循舊例。毋庸議外。至九江。粵海。蕪湖。鳳陽。清江。廠北。新天津。浙海等關。並廣西之桂林。平樂。梧州。潯州。富川。賀懷集等府縣。皆稱徵收船料。揚州。由牘。淮安。宿遷。臨清。滄野。夔關等處。皆稱籤量計石。按例徵稅。未便遽行更張。但米穀為民食所資。與百貨



不同。若不分別豐歉。概行徵收。恐歉歲省分。致增米價。有妨民食。嗣後舊徵米稅。船料各關。除豐登之年。遵照舊例。按則徵收外。儻地方偶遇旱澇。其附近省分各關。口令該督撫。即將被災情形具奏請

旨寬免。凡米穀船一到。即便放行。俟該地方秋收成熟。方准按照舊例徵收。再廣東開建恩平三縣米船稅銀。均屬奇零商販。不同外省大商巨艦。永停徵收。○又議准沿海地方內商出洋。暨洋商入市。每船覈計人口。及往返程期。每人糴米。

日以升半為率。毋許逾數。奉天省貿易商船往天津者。每名准帶食米三市斗。往山東者。准帶五市斗。往江南者。准帶一市石。往福建廣東者。路程雖遠。然經由浙之甯波。江南劉河等處。可逐程買補。亦准帶食米一市石。令各船戶出口時。呈明驗放。如定數之外。再有多餘。以私販治罪。○三年奏准。回空糧船。捎帶零星梨棗六十石以下。免其權課。○又覆准。凡裝載米糧船。查明實係販往歉收地方者。免稅放行。仍給印照。至歉收地方關口查驗。填明到關月日。鈐印發

票令其回關查照。如回船載有他貨。止徵貨稅。免其船料。僮販米船不往歉收地方卸賣者。仍照例輸稅。如有捏稱販往歉收處。給有過關免稅印票。而竟往他處販賣者。查出照漏稅例罰懲。○又

諭。今春因直隸米價昂貴。朕特頒諭旨。將天津臨清二關及通州張家灣馬頭等處米稅寬免徵收。商賈聞風踴躍往來販運。民食無缺。已有成效。嗣因二麥有收。經管理天津關報部。行直督察覈。隨經督臣覆奏。照例開徵在案。近因沿河地方被水較重。附京一帶

米價加昂。現在又開海運。商販必多。仍應免輸稅銀。以示鼓舞。著將內河前項米糧各稅一併暫停徵收。俾商賈爭趨雲集。於畿輔民食自有裨益。即速行文督臣等知之。○又題准出海樵採船。每船准帶食鍋一口。每名止許攜斧一把。在船人數不得過十人。令地方官俱於照內註明出入查驗。有夾帶出口。及進口缺少者。即行嚴究。○又覆准松江等屬給有印照出洋樵採小船。按海道遠近。人數多寡。每人日准帶食米一升。餘米一升。○四年奏准許墅關續設蠡口港等十三處。王莊等

十處。顧二房廊下等五處口岸巡攔稽查偷漏。暫為存留。毋庸裁汰。仍不作報部經制。其附近鎮集船載米不及十石。及農民交租辦糧質當米麥。並本地土貨。概不得徵收稅銀。○五年奏准嗣後在京在外官員家眷船過關除無貨物照常驗放。如有姦牙土豪假捏京官名帖討關等弊。該管官即行拏究。或京官子弟執持父兄名帖討關夾帶貨物希圖免稅者。照例叅處。如該管關官不行詳查。及明知瞻徇者。一併議處。○又覆准贛榆縣雜糧黃豆。照東省之例。許令

運往劉河糶賣。○又定各處差船並裝載官物給有勘合火牌者。合計程站人口。每名日需帶食米一升。煤一斤。僮有多帶及夾帶別項貨物。船戶究處。差官查叅。○六年奏准嗣後各關領帑委官採辦錫銅鉛。經過關口。查驗文批數目相符。立即放行。不得收納稅課。其有額外多帶餘銅及夾帶別項貨物。則照例徵收。如有偷漏情弊。令該監督報叅。其運載船。既照時價給發水腳。仍輸納船料。○又題准嗣後各省發帑委官採買賑濟及糶三補倉米穀。經過各關口。免

其納稅止徵船料○又

諭外省關課皆久經該督撫就近稽查除現設口岸報

部有案者照舊設立外其有私行增添之口岸逐一  
詳查報部應留者留應革者革此番清查之後司權  
之員若再有違例苛索者胥役嚴處官吏嚴叅該督  
撫不行查叅經朕訪聞必於該督撫是問○又覆准  
裁撤許墅關之黃埠墩○又覆准北新關之大  
嶺一處裁革至姚石陡門松木古蕩南北中塘  
獨松關千秋嶺四處嗣後五六兩月絲期該關  
派出差役報明督撫備案止許在額定地方巡

查外來私售窩囤絲斤不許越境將民間原不  
售賣絲斤指為漏稅並於查絲之外藉端擾累  
如違將巡役究處○七年覆准北新關經過米  
船照舊徵收梁頭課銀不必計石科稅其空船  
過口亦照舊免其納料○又

諭朕惟惠養萬民之道以輕徭薄斂為先自御極以來  
於蠲租減賦外豁除各省關稅不下百萬又令將稅  
課規條刊刻木板徧行曉諭不許額外徵收宜其商  
民均霑惠澤行旅各安牧圉乃近聞各關過往商旅  
尚不能普被恩惠怨聲嘖嘖究其由來皆因司權之



家人胥役巧立名色重斃徵收勒捐需索弊端百出。不飽其欲則逗遛不肯放行大為行旅之害。是國家徒有減稅損上之德而商民未受減稅益下之恩。無知者尚嘵嘵於稅課之重。所謂不揣其本而齊其末。即使再減數百萬額稅用是以往。朕知其於商民仍屬無益也。夫司權官員一任家人胥役肆橫無忌。漫無覺察商旅其何以堪。朕思督撫有稽查通省之責。凡屬地方利弊何一不當留心釐剔而關稅弊竇若此。朕在京尚有所聞。督撫身在本省。豈竟一無聞見乎。總因視非己事故爾漠不關心耳。嗣後著該督撫

嚴行訪察。遇有此等弊端。立即嚴拏重究。如司權官  
員。瞻徇袒護。亦即據實奏聞。不得視為具文。以奉旨  
之後。一查即可了事。務期實力稽查。俾商民永無苦  
累。儻朕再有所聞。或被科道指實。叅奏。朕惟該督撫  
是問。○八年奏准江蘇省起運賑糶米穀。非同客商  
米穀。是以給發水腳。止能計站數。給而經由關  
口。難於豫定。不能包算。船料在內。其從前酌定  
腳費。每米穀一石。每百里給銀八釐之例。既無  
應輸船料在內。而較之民間雇募腳價。實屬短  
少。每遇撥運雇覓之時。船戶率多畏避。若再令

其完納船料勢難賠累應將在官撥運米穀免徵船料○又覆准凡產米之地令各海口文武官每月出具並無粟米出洋印結呈送督撫提鎮存查○九年奏准嗣後福建如遇歉收之年委官於米賤省分購買海運接濟不得招商販運以滋弊竇○又奏准凡來京之蒙古除進貢物件乾糧茶葉自京帶去俸祿

恩賞緞布照例查看放過若隱漏不交稅課或替商人偷運物件過關將蒙古及希圖傲幸之姦商一併治罪○十年題准福建省臺灣一府產米

素饒泉漳諸府多仰給於臺粟。今商漁船搬運過多，以致漳泉諸府失所援濟。嗣後商船每船止許帶食米六十石。於出鹿耳門之先，令臺防同知查驗，有多帶者，分別責懲。餘米就地起賣。儻不能驗明，致有夾帶，至入口盤出，或別處發覺者，將該同知照例分別米穀多寡議處。其沿海港汊紛歧，難免偷漏，令地方文武官弁實力巡查拏禁。○十二年覆准福建省舢仔頭船，梳高蓬大，利於走風，未便任其置造，以致偷漏。永行禁止，以重海防。○十三年覆准偷運麥豆雜

糧出洋者。照偷運米穀之例科斷。○十四年覆  
准將紅黃銅器銅斤私販各洋貨賣者。分別治  
罪。貨物船隻入官。其關汛員弁不行接拏。知情  
故縱者。革職。如係賣放。照例治罪。若止失察降  
一級調用。○又覆准麥豆雜糧到關輸稅時。稅  
單填明數目。並發賣地方。出口時。守口員弁驗  
明關照稅單。加戳挂號放行。入口時。守口員弁  
查驗。若領單出口。遲久不到。及入口查驗無糧  
石者。追拘訊究。○又奏准商人自奉天省回時。  
大船帶黃豆二百石。小船帶一百石。儻有額外

多帶分別治罪。歛收之年隨時禁止。○十六年覆准領運銅鉛各員。俟交局之後將贏餘數目報明戶工二部。行令崇文門照經過各關應交稅課通盤覈算。照例納稅。如有以多報少。照漏稅律治罪。○十七年定恰克圖庫倫等地方商販牛羊駝馬。令由張家口進關納稅。應進古北口者。止帶馬數匹。羊數隻。查明實非商販。聽其自便。○二十二年覆准商販赴豫米石。經過鳳陽九江等關。照例免徵稅料。但各關距豫遠近不同。不無姦商藉赴豫蒙混過關等弊。令各該

關凡遇商販米船經過。查有本地方官印票開  
明赴豫者。暫給免稅照票。聽其過關。仍令於運  
往之災地。取具州縣官回文。俟回船抵關時。呈  
驗。方免其追繳。如回船時並無災地回文。或不  
回過該關。即以漏稅論。照例緝拏追繳。○二十  
四年議准。各省絲斤紬緞。違例出洋。分別治罪。  
船隻貨物入官。失察之文武各官議處。○二十  
五年覆准。粵海關一切陋規名色。俱行刪除。統  
作歸公字樣。將更定條款刊榜曉示。如吏胥格  
外需索。照例嚴懲。○又奏准。出洋採買官銅額。

商每船配搭紬緞三十三卷每卷照向例計重一百二十斤。責成乍浦上海二處照例秤驗。並將該商裝載糖藥紬緞各數及所收稅銀出口日期報戶部查覈。○二十六年覆准鐵器一項殺虎口於商販出口時詳細查明如係農具及民間日用器物按則徵稅將名色件數註於票內令商持票赴口驗放仍令監督將應行禁止與毋庸禁止之物刊榜曉諭。○又奏准運員餘贖銅鉛點錫應納沿途各關稅課差竣回省之日於應領養廉等銀扣存解部。○二十七年覆



准嗣後一應官民船隻過關均應查驗輸稅至各省貢船將貢物開單用印文知會關口查驗此外凡有貨物均令納稅如監督意存容隱該督撫即行題參○又議淮南自閩浙北自錦州登萊來江南船隻並通州土貨經渡劉河等口者歸海關收稅其湖廣江甯自江而下及北來由淮揚之船盡收京口由許墅關收稅外海船不許私入江口以重洋禁○又覆准許墅關向由鋪戶代客完稅包攬居奇舞弊無窮盡行禁革聽商自納如書役苛索聽其稟究至貨船到

關應先行查驗籤量明白。令其赴關納稅。過關後不得稽留。並委佐雜四員。督同籤驗貨物。稽查鋪戶書役等弊。半年一換。儻不能稱職。即行撤回。如有地棍盤踞串通舞弊等事。該督撫查出。嚴行究治。並將坐關委員監督奏請議處。通行各關一體嚴禁。○又覆准。許墅關貨船到關。先聽本商報稅。於過關後逐一籤量。若有少報。照例示罰。○又奏准。天津關有偷漏者。按稅加罰三倍。一半賞給巡獲人役。一半充公。淮安關每貨百石。籤多十石以上者。除正稅外。仍罰一

倍多二罰二。多三罰三。北新關匿漏稅貨查獲  
量罰一二倍。○又

諭英吉利夷商伯蘭等以絲斤禁止出洋夷貨艱於成  
造。願懇代奏酌量准其配買。情詞迫切。前因出洋絲  
斤過多。內地市值翔踴。是以申明限制。俾裕官民織  
紉。然自禁止出洋以來。並未見絲斤價平。亦猶朕施  
恩特免米豆稅。而米豆仍然價踴也。此蓋由於生齒  
日繁。物價不得不貴。有司恪守成規。不敢通融調劑。  
致遠夷生計無資。亦堪軫念。著照該督撫等所請。循  
照東洋辦銅商船搭配紬緞之例。每船准其配買土

絲五千斤。二蠶湖絲三千斤。以示加惠。外洋至意。其頭蠶湖絲及紬綾緞疋。仍禁止如舊。不得影射取戾。

○又奏准夷商配帶絲斤。內准絲織紬緞斤數。照八折計算。統在八千斤數內。不許額外多帶。

○二十八年覆准古北口設立稅局。交張家口監督稽徵。嚴防繞漏。如進口牲畜。在多倫諾爾等處報明納稅者。毋庸重徵。若未納稅。照例收課。其外藩蒙古王公台吉等來京。所帶騎馱馬駝口食羊隻。例應進口之項。毋令關役藉端滋擾。至張家口商販到關鐵器。照殺虎口之例。納

稅出口。○又覆准山東省豆石聽商由海販運  
江省內地發賣。久經奏定章程。江省之上海劉  
河。與浙省之甯波各海口。同屬內地。照運赴江  
南之例。聽商由海販運來浙。以資接濟。至各汛  
口稽查之法。悉照運江成例辦理。○又覆准天  
津關苑口等十二處。過往貨物。俱按部頒則例  
稽徵。不得仍前減收。曉諭商民。遵例完納。○又  
覆准各關陋規。現據查明。應留應革。款目會同  
各該省督撫。分析奏報。除武元城殺虎口。贛關  
荆關。九江關。打箭鑪。夔關。渝關。八溝。多倫。諾爾

潘桃口。潯州。梧州。辰關。崇文門。左翼。右翼。中江。等處。並無陋規。外其應留款內。如西新關之飯食。一款。浙海關之件頭飯食。一款。閩海關之平餘罰料截曠三款。粵海關之規禮擔銀併平罰料截曠。以及舟車飯費等六款。太平關之併封平餘一款。淮安關之飯食罰倍二款。坐糧廳之飯銀。單錢。票錢三款。山海關之飯銀一款。張家口之飯錢一款。實因各該關口公用浩繁。勢所必需。商民日久相安。並無苛累。准其照舊存留。至鳳陽關經牙一款。係從前奏明之項。准其留

關充用。仍嚴行查察。毋令經牙潛行包攬。以清弊竇。又臨清關之米麥雜貨徵收貼併飯銀二款。天津關之罰倍捆馱船隻銀錢三款。武昌廠之順風錢文輸金銀兩二款。南新關之算單寫單鈔號蓋戳。並各口書總錢文五款。北新關之大關查驗各口查驗船書挂號單書寫單各錢文。及罰倍銀兩五款。揚關由牖之看艙規費一款。鳳關之起票驗照看艙三款。胡納胡河之印戳制錢一款。奉天牛馬稅之火耗飯錢二款。皆係經費必需。勢難裁減。且數目零星。不為苛擾。

准其存留。但其中銀錢數目。各有參差。恐關役人等藉端影射。漸滋他弊。令各管關督撫監督。指定徵收款目。刊刻木榜。豎立各關口岸。俾來往商民咸知遵守。又蕪湖關戶工幫貼飯費二款。與應革款內。江海關之駁票給單掛號油燭飯費看倉錢文五款。揚關由牘之給串票錢一款。應按款裁革。以免滋弊。至報出銀兩。於收稅款內均改充公字樣。以昭遵守。儻此次清釐之後。各關仍有未經報出銀款。及陽奉陰違。格外多取情弊。一經查出。除該關人役從重治罪外。



並將失察之督撫監督等嚴加議處○又奉

旨琉球國疏請配買絲斤情辭懇切著加恩准其歲買  
土絲五千斤二蠶湖絲三千斤餘悉飭禁如舊○又  
奉

旨將古北口稅局撤去嗣後張家口商貨繞越私行者  
仍准派役稽查○二十九年覆准浙江省往東洋辦  
銅商船每船准帶細緞三十三卷廣東省外洋  
商船每船准加帶粗絲二千斤至本港商船每  
船配帶土絲二蠶絲共一千六百斤細緞八折  
扣算○又覆准江蘇省往閩粵安南等處商船

每船准帶糙絲三百斤。浙江省內地商船往東洋辦銅及南洋等處貿易者。每船准配土絲一千斤。二蠶糙絲一千斤。福建省海洋內外商船。每船許配帶土絲一千斤。二蠶糙絲一千斤。三十年奏准琉球國歲買絲八千斤。內改配紬緞二千斤。照夷商配買之例。每紬緞一千斤。抵絲一千二百斤。三十一年奏准許墅關漏稅照稅倍罰。三十三年覆准歸化城出產油酒煙皮張等項及關東等處發來商貨。從草地行走。未經殺虎口徵稅者。俱為口外土產。歸化城

按則抽收其內地一切雜貨販運出口。經由殺  
虎口納過稅銀。到歸化城入鋪零星發賣者。不  
再重徵。若貨物運抵歸化城以後。商販車載馱  
運。又販往他處售賣者。則無論土產與外來貨  
物。均於出柵時。按則收稅。至民間零星日用物  
件。如布疋一二疋。煙僅兩三包者。不在收稅之  
例。嚴查家人胥役。毋許苛擾。○又奏准嗣後押  
送官辦貢品。俱令開單行文各關照數查驗。按  
例稅課。如有隱匿夾帶。立即拏究。將押運員役  
治罪。仍將到關日期。並驗放數目。具文交該差

來京呈報各該處查對。儻有瞻徇致蒙混脫漏者。查出照徇庇例議處。○三十四年議准九江關木牌到關。向由保家引領完稅。全行禁革。令商自納。以杜串通滋弊。仍派員督看商人親填印簿。設立兩聯串票。一給商人。一存本關。以便查對。並飭該監督毋許於經制書役之外。濫用白役。○又覆准九江關每正稅一兩。徵平餘銀一分。以為添補飯食巡役賞需之用。毋得於一分之外。藉名多索。○三十六年覆准北新關屬之滷口城南務二處。各設巡船二隻。查察偷出。

鼈子門貨物。其上江船隻。驗有海關稅單者。不  
得重徵。千秋嶺一處。派撥單書巡役常川住守。  
查驗貨物絲斤。押赴大關查辦。仍不准徵本處  
土貨。○三十七年奏准。商人船隻出洋。務須查  
明各商真實姓名。何處人氏。居住何地。及往何  
洋貿易。令地方官給照。至口呈驗。方准放行。其  
從外洋販貨進口者。亦必詳查人貨。訊明經由  
何洋。概行註冊。○又覆准。嗣後奉天省黃豆。歉  
收之年。仍隨時禁止。如歲屬豐收。各海船於到  
奉天之時。任商販運。毋庸限以成數。所有海運

黃豆豆餅經由山海關著照臨清關科則每石  
徵銀一分一釐○又覆准河西務查驗重運漕  
船起剝粗細貨物覈計在例帶土宜一百二十  
六石數內免其權課其額外多帶之貨仍照例  
徵稅○四十一年奏准各省撥運米穀督撫原  
俱給有委牌嗣後令於委牌內填明撥運米穀  
數目經過關口驗實放行其所雇船隻應納過  
關船料責成撥運各原省之布政司於給發船  
戶雇價內照則扣除知會各關免其重納○又  
奏准客商漏稅照例治罪若所漏之稅無多分

別議罰免其究治。又閩海關漏稅數錢至一兩者倍罰其稅。一兩以上至三兩者三倍。三兩至五兩五倍。粵海關漏稅五錢以上加罰一倍。一兩以上。兩倍。二兩以上。三倍。三兩以上。四倍。四兩以上。五倍。五兩以上。貨物一半入官。○又奏准海洋商船令報明海關監督及地方官確查取結成造將船身烙號刊名查明在船人口填給執照出口時呈官驗放舵水人等遇有事故許船戶召募請照頂補如有詭名頂替及多帶舵水人等汛口官盤查不實或有勒指情弊分

別議處其在洋商民因風屆期不能回籍該管海關廳縣給照行知該地方官俟回日報銷○又奏准山海等關一年之內控獲人淺至二十斤珠子至四兩者巡查人等賞銀二十兩每淺二十斤珠子四兩遞加賞二十兩該管官議敘若控查不力致私帶過關者官查議役責處○又覆准歸化城徵收稅銀四柵之外商販多有繞道偷越責成該處營弁於巡防之便在和林格爾東白塔兒二處查察如有偷漏拏送管稅道員查辦○又覆准綏遠城所開麵鋪在本城發



賣兵民零星食用者不准收稅。如有車載馱運他處售銷者。照歸化城之例一體收稅。○四十二年奏准緬匪需用之黃絲等貨。不許販至潞江緬甯隘口。該處刊刻木牌榜示路口。有私販出關者。查出貨物入官。本犯究處。○四十五年奏准琉球國貢船來閩。及事竣回國所帶貨物。概免徵稅。○又覆准九江關之西二十里有漢河一處。名二套河。即大江之支流。向有土埂二條。阻截舟楫。如夏月水漲。漫溢土埂。細小木把。從此偷越。自宜臨時相機設法稽查。如非水漫。

之時仍從其舊。毋許藉此添派官役。多設一口。致滋紛擾。○四十六年覆准。旗人賣買房地。如有赴大興宛平二縣私稅民契。照違。

制論。仍令赴左右兩翼補稅換照。如大興宛平二縣。知情私准納稅。亦照違。

制律議處。○四十七年覆准。嗣後外洋夷船進口貨物。應納粵海關稅銀。照舊於回帆時輸納。出口貨物稅銀。令保商代置貨物時。隨貨扣清。先行完納。○四十九年奉。

旨。嗣後粵海關珍珠寶石。概不准徵收稅課。著為令。○

又奏准福建省蚶江口。原屬海關泉州稅口管轄商民出入販運。船經泉州既已徵輸。蚶江一口止設員役稽查。不復科稅。○又覆准福建省泉州府晉江縣屬之蚶江口。臺灣府彰化縣屬之鹿仔港。設口開渡。其廈門商運船隻仍照舊編記冊檔。出入挂驗。不許越赴蚶江渡載。蚶江商漁船隻出口。責令蚶江通判驗明編號挂驗放行。如有違例偷渡。人照不符。及夾帶禁物等項。查拏究治。若文武官員故縱失察。分別叅處。至鹿仔港海口出入船隻。令鹿仔港同知查察。

○又覆准山東奉天二省豆石商民運到浙江甯波鄞港銷售有餘准福建商船購運回閩令鄞縣驗明豆數填給印票並於船照內註明裝豆數目運回何處貿易字樣赴浙海關納稅出口時防守汛口員弁印戳挂驗放行仍按月造冊關會福建進口處所稽查如有遲久不到及到口查驗無豆石者即行查究○五十年定福建省商人在浙江購運豆石鄞縣填給印票每票不得逾一百石守口員弁查驗如無鄞縣印信即係私運雖有別衙門鈐印概不准放○五

十一年定。台州、温州二府商民在鄞港販買豆石海運回籍。照轉運福建省之例。每票以百石為率。令鄞縣驗明豆數。填給印票。赴海關納稅。並於船照內註明裝豆數目。運回何處。字樣。況口員弁蓋戳。掛驗放行。仍按月造冊。移知往賣之縣查察。如遲久不到。及到口無豆石者。嚴行追究。○又定。崇文門向來每月初一、十五二日。因天津引鹽入城。俱由崇文門驗放。車輛過多。恐有夾帶偷漏。是以停止。過務。今引鹽陸續進城。兩無妨礙。令其初一、十五日。照常投單過務。

以便商民。○五十四年

諭安南向通貿易。自設禁以來。罕有內地貨物。民用所需。諒必短絀。今該國王輸誠效悃。以就藩封。其境內黎元皆吾赤子。著該督撫將水口等關。即令照常貿易。以副朕胞與為懷一視同仁至意。○五十五年奏准緬甸所需絲絀鐵紙等物開關通市。所有內地商民販貨出關。責令永昌府騰越州順甯府收稅給照。運至騰越州所轄之杉木籠。暮福二處。及順甯府所轄之南河口。驗照放行。內地商民販貨回關。並緬夷運貨進關。即由杉木籠暮

福南河口收稅給照運至騰越州順甯府查驗  
其普洱府所轄路通緬境之車里各土司內地  
小販挑負往來貨物無多不須設口令思茅同  
知於南關地方撥役稽查○又覆准臺灣府屬  
淡水八里坌對渡五虎門設口開渡所有渡往  
臺灣商民在福建省置貨貿易不能赴原籍領  
照者令行保查明具結報福防同知就近給照  
移明淡水互相稽覈其由淡水內渡免其給照  
令取具行鋪認保開明姓名年貌籍貫由船戶  
持交管口員弁驗戳放行儻商民不由行保出

結報明該管同知衙門給照私自偷渡者以私渡關津論行保人等知情故縱與偷渡之人一體治罪至沿海小港如福甯府屬之南鎮等汛興化府屬之涵江等汛廈門之大擔小擔等汛漳州府屬之島嶼等汛均可直達臺灣而淡水之八尺門彰化縣之海豐港嘉義之虎尾溪鳳山之竹仔港皆可容小船出入責成沿海各屬及守口員弁實力查禁如拏獲無照船隻私渡者船戶照越渡緣邊關塞律治罪船隻入官若文武官員有故縱失察情弊分別叅處其有照



商船因風漂泊收岸者。驗明牌照放行。○五十六年覆准內地赴安南貿易商民。先由本籍報明地方官。填給姓名年貌籍貫。並貨物人數印照。如貨少人多。不得濫給。其從平而水口兩關出口者。將印照呈報龍州通判查驗。給予腰牌。從由村隘旱路出口者。呈報甯明州驗明給票。行至明江。再由該同知換給腰牌。至南甯府流寓商民。置貨赴安南貿易者。赴宣化縣呈報。就近給照。其各處商民行抵南甯府。將原貨出售。另置南甯之貨出口者。由宣化縣查驗換給印

照前往仍令關隘營弁驗明人貨與牌照相符  
立即放行不得留難自安南進口商民驗明牌  
照立時放入不得指阻違者分別嚴參儻有出  
口商民年貌人數貨物與牌照不符經關隘營  
弁查出即行逐回並將濫給照票之原籍地方  
官叅處○五十七年覆准赴安南貿易商民所  
置之貨由潯州梧州兩廠收稅龍州隘口免其  
徵收

欽定大清會典事例卷二百四十

戶部

關稅 禁令二

嘉慶四年

諭向來漕船准帶土宜一百二十六石例不報稅著再加恩准其多帶土宜二十四石共足一百五十石之數○五年

諭上年將關稅贏餘酌加裁減原以體恤行旅加惠商民在各關監督等自當仰體朕恤商惠民之意不敢於正稅之外復有勒索擾累之事而所派之巡役家

人等難保無肆意苛求藉稽查稅務之名妄行勒捐情弊現在盧溝橋彰儀門經管稅局人役竟有訛索過往行人銀錢等事業經分別懲治輦轂之下尚敢如此其餘各省關稅種種情弊不問可知該監督等所管稅口不止一處於稽查稅務一節不能不另派胥役家人等分任其事務當諄切曉諭不許例外訛索仍時加查訪嚴行管束以絕弊端嗣後京外各關稅局除隨時密訪外或別經告發或被人指叅如再有訛索飯錢擾累商旅等事不獨將所派之巡役家人等從重治罪並將各關監督一體嚴辦示懲不稍

寬貸○六年復准閩海關徵收二八添平銀兩永行  
革除○十四年奏准各國貨船所帶護貨兵船  
不許擅入十字門及虎門各海口如敢擅進守  
口員弁報明驅逐停止貿易至夷船到口即令  
先報澳門同知給予印照註明船戶姓名守口  
員弁驗照放行仍將印照移回繳銷如無印照  
不准進口所有夷商買辦之人由澳門同知選  
擇取具保結承充給予印照在澳門者由該同  
知稽查在黃埔者由番禺縣就近稽查如代買  
違禁貨物及勾通代雇民人服役查出治罪失

察地方官查叅○十七年

諭崇文門稽查課稅地面多係京營所轄即著該管營汛官員分任巡查如有私收私放訛索並冒充白役情弊一併嚴拏懲辦○十八年

諭據德慶奏查辦關務情形一摺粵東洋商承保稅餉向來僅憑一二商人保舉准充旋因虧折疲乏拖欠逋逃弊竇叢滋著照該監督所請准於各行商中擇身家殷實居心誠篤者選派一二人令其總辦洋行事務率領衆商公平整頓其所選總商先行報部存案遇有選充新商時即責令通關總散各商公同聯

名保結。專案咨部。如有黜退。報明註銷。並於每年滿  
關日。將商名通行造冊送部。以備稽考。○十九年議  
准內地銀兩。毋許商船偷運出洋。責令地方文  
武監督。各口員弁丁役人等。實力稽查。如有洋  
商人等。將銀兩私運夷船出洋者。照例治罪。儻  
各口員弁丁役人等。扶同隱漏者。查出從嚴究  
辦。○又

諭關市之設。所以通商便民。成法極為詳備。近日該管  
官奉行不實。日漸廢弛。各關口應立之稅課木榜。並  
詳單小本。均不豎立。刊刻商賈不知。稅例多寡。任聽

家人吏役額外押派多收少報虧課病高叢滋弊竇。至各省才行亦不按年清查率多頂冒朋充甚或假託官差多方苛索俱應隨時查禁著通飭管理稅務衙門及直省地方官申明例禁實力奉行毋任姦胥市僧勾串欺蒙以除積蠹。二十年議准海州流陽贛榆一路凡應赴淮關投稅之豆餅等貨概不許從青口行走繞由海運責令海州流陽文武員弁輪赴青口同淮關監督派役巡查。又議准鳳陽潁州一帶所出豆餅應由洪澤湖載運南來赴淮關投稅毋許徑走臨淮關鈔路南下。



淮關監督仍遠派妥役渡湖巡查以杜偷越○  
又議准丹陽常州無錫等處路通太湖南北往  
來雜貨多從此處偷越飭地方官幫同許墅關  
監督查禁拏獲究治○又議准豫東豆石運赴  
蘇松例由許墅關納稅其有繞至滕家壩分剝  
出江並從任家港黃田港出口直至上海者均  
令各該地方官稽查嚴禁並於黃田港添設巡  
船駐守巡查○又議准重運糧船抵許墅關運  
弁齎帶印票赴關挂驗若於照票之外包攬客  
貨一經查出官叅丁處○道光元年議准徐關

雜糧無論外來土產數至七石以上。稅過二分者。按石收稅。其數不及七石。稅不足二分者。免其徵收。○二年

諭御史許乃濟奏請嚴禁崇文門稅局需索蠹弊一摺。所奏甚是。各關徵稅科則責令該管官詳刊木榜。豎立關口街市。並令地方官將稅則刊刷頒發。定例本為詳備。即崇文門有商人漏稅議罰之條。亦自有一定章程。豈容意為高下。若如該御史所奏。崇文門稅局於尋常行李往來。不論有無貨物。每衣箱一隻。勒索銀二兩四兩至八兩之多。或偶然攜帶常用物件。

不知應稅料則一經查出輒以二十倍議罰。即有照例開報納稅者。又以輸課無多。仍百計刁難。否則押赴官店守候。不准放行。京師為萬方輻輳之區。乃任書役恣意婪索。苛及行旅。若此。不可不嚴申禁令。著該監督遵照定例。於崇文門及分口巡查之盧溝橋東壩板橋海淀等處。一律添設木榜。仍著順天府刊刷科則定例。每年頒發。俾眾咸知。並責成巡視五城御史。隨時前往認真稽察。如有濫行需索。擾及行旅情事。即行據實參奏。不得日久視為具文。務期革除積弊。以懲閹蠹。而便商旅。○三年

諭各關正額贏餘例有常數近年徵收虧短緣積弊未能悉除凡關津市鎮地方往往有惡棍把持蠹役盤踞及牙行鋪戶人等相緣為姦包攬商賈串屬在關家人書吏以重報輕以多報少通同掩飾漁利分肥甚至納賄私放偷漏隱匿皆所不免嗣後各關務須實力整頓訪懲姦蠹包攬等弊嚴行約束家人書吏毋得稍有徇縱俾權務胥歸覈實以裕課項○四年諭阮元等奏請定洋米易貨之例一摺廣東粵海關向准洋米進口雜費免輸船鈔雜稅回國不准裝載貨物近年以來該夷等因回空時無貨壓艙難禦風濤

且無多利可圖。是以米船來粵者少。自應將成例量  
為變通。著照所請。嗣後各國夷船來粵。如有專運米  
石。並無夾帶別項貨物者。進口時照舊免其丈輪船  
鈔。所運米穀。由洋商報明起儲糶賣。糶竣准其原船  
裝載貨物出口。與別項夷船一體徵收稅課。彙冊報  
部。以示體恤。○六年

諭旨。晉昌等奏驗放海口運糧小船章程一摺。天津沿海  
州縣漁船。前經直隸奏定章程。准其請領船票糧照。  
前赴奉天販糧。茲據晉昌等奏。奉天海口各船。請照  
直隸章程一律辦理。著照所請。所有奉天漁船。准其

報明各該旗民地方官查取保結編號烙印造冊報部發給船票飭令照例納稅其願領糧照載運糧石者即與天津漁船均照商船每隻徵銀二十兩之例減半徵銀十兩仍照部議以八兩五錢解部一兩五錢作為兵役飯食紙張之需仍嚴飭行店人等毋許格外多索行用飯錢其在海口停泊上載責成該旗民地方官各於要隘處所實力巡查毋任偷漏亦不得索擾滋弊天津奉天互相查驗換給回照彼此稽察儻有棍徒把持私充經紀擾累商民即著嚴拏照例懲辦其岫巖鳳凰城等處恐有偷運等弊仍照成

案。不准存留船隻。○九年奏准。凡夷船來粵貿易。停泊黃埔。即令夷商寫立。並無夾帶鴉片字據。交洋行保商加結。復由洋商輪查。無異方准開艙起貨。如夾帶鴉片。即將該夷船驅逐出口。永遠不准來粵貿易。僅有任令夷人夾帶鴉片入口。即將該洋商等照例治罪。並嚴飭巡洋舟師及地方文武派撥巡船。於夷船來粵灣泊之時。嚴密巡查。如有民船攙近夷船。立即拏辦。以防代運鴉片。及違禁貨物。至夷船進口。仍飭守口員弁逐一嚴查。僅有鴉片等物。即時飛稟查辦。如

有隱匿。從重懲處。○又議准。夷商與內地行商交易。除以貨抵貨外。價銀不敷。彼此均以番銀找給。嗣後行商找與夷人貨價。有撓用官銀者。除充公外。仍照私運例治罪。各口員弁丁役人等。查獲船載赴洋官銀。先交地方官訊明。在何處起獲。即將該船經過上游各口員弁丁役。照扶同隱漏例。嚴行究治。僅有行中小夥及地方不法匪徒。將官銀偷載小艇。暗運出口。責成大關總巡。並佛山虎門等處關口員弁巡船。並巡洋舟師。及地方文武派撥巡船。於各夷船將次



回國時嚴密巡查。遇有私載官銀立即拿辦。並究明官銀來歷。如係由銀店茶葉雜貨等行發出。分別知情不知情。照例懲治。僮係洋行中發出。將該商加等治罪。○又議准夷船來粵貿易。以貨易貨。勢不能價適相符。嗣後如有數行洋商。我給一夷商銀兩。必先同赴粵海關監督衙門。聯名出具並無攙和官銀甘結。再行我給。夷人收銀後。僮經員役查出官銀。將我付官銀之行商嚴行治罪。並將聯名各行商一體治罪。○又議准澳門地方。向許內地民人在彼與夷商

交易責成澳門同知就近稽查凡民人向夷人  
買物不許使用官銀亦不許將官銀換給夷人  
如有前項情弊拘拏治罪該同知漫無查察別  
經發覺將該同知嚴叅○又議准番銀成色低  
潮不及九成者不准在內地使用僮夷商以此  
勒買貨物許內地賣貨商人呈報由官送交該  
國大班從重究治內地商人隱忍收受一經查  
出或被首告即將所收低色番銀無論多寡概  
行充公仍將該商照例治罪○又

諭延隆奏請變通召募新商章程一摺粵省開設洋行

向來止憑一二商保結。即准承充。自嘉慶年間。奏請設立總商經理。其選充新商。責令總散各商聯名保結。該總商等往往意存推諉。以致新商格於成例。不使著充。數年以來。夷船日多。行戶日少。照料難周易滋弊竇。自應量為變通。著照所請。嗣後如有身家殷實。呈請充商者。該監督察訪得實。准其暫行試辦。一二年果能貿易公平。夷商信服。交納餉項。不致虧短。即照舊例。一二商取保著充。其總散各商聯名保結之例。著即停止。○又奏准崇文門拏獲燒酒私販計其匿報稅銀多寡。分別治罪。所獲之酒。照例入

官仍將追罰銀兩一半存公一半充賞其罪至  
流徒無罰項可追者於崇文門追罰存公項下  
動支賞給其失察官弁兵役議處責革知情故  
縱者與犯同罪受賄者計贓從重治罪○又

諭吏部奏覈議御史安豐奏嚴禁京外各關書吏頂替  
朋充著責成各關監督嚴行飭禁有犯必懲並不准  
於監督任滿時通情保舉任意留充盤踞儻該監督  
有瞻徇情事著各該督撫查明叅奏照例議處自此  
次申諭之後各該管官務當隨時認真查察實力奉  
行儻日久懈生仍致該書吏有朋充戀役之弊或被

人告發。或別經叅奏。除將該吏按律治罪外。定將失察之該管官。一併懲處不貸。○十年奏准。粵海關進口貨物。於夷船清艙之日。責令保商報明某貨某行買受。某貨夷人尚未賣出。已賣之貨。由行商完納。未賣之貨。由夷商交餉。保商代納。凡有一船回帆。即將一船進口餉銀完交。方准請牌出口。其出口稍遲者。以驗貨後三月為限。責成保商完納。不得緩至請牌之時。○又

諭御史寅德奏。崇文門稅務。請仿照倉庫等例。特派御史專司查察。一摺。崇文門設立稅局。原以稽察行商。

盤詰姦宄應稅貨物固不容稍有偷漏而往來行旅尤不可任令胥吏等恣意婪索若如該御史所奏近來稅局巡役過多該役等所有親戚及熟識閒雜人等每向該管委員請討論帖因此藉端影射輒用白役多人需索訛詐以致來往官民人等視為畏途且聞各門稅局遇有裝載行李車輛到門每一衣箱索取銀四兩至八兩十兩不等其姦商私販違禁等物夾帶進城胥吏等轉得受錢文私行賣放京師為萬方輻輳之區似此滋擾舞弊不可不嚴行查禁嗣後著都察院堂官揀選滿漢御史擬定正陪帶領引見

候旨派往該處專司查察其更換之期以一年為滿如胥役人等。於不應盤查之人。故事勒捐遲留。而於例應訪拏違禁貨物。輒行受賄賣放。該御史等一經查出。即行指名叅奏懲辦。所有該處稅務。不准該御史等干預。儻該御史等有心撓越。或受人請託。有授意免稅。及縱容家丁需索。滋擾情事。即著該管大臣等據實叅奏。務須各循職守。互相稽覈。於國課民生。兩有裨益。不可日久視為具文。○十四年

諭明倫奏淮安漏課。惟青口易於繞越。查禁難行。該處並無閘口。來往稽查。不能得力。等語。閘稅為國用攸

關均係久經酌定數目相沿徵解豈容以今昔情形不同藉詞繞漏病權不思設法查禁輕議變通舊章上年慶琛以淮關稅課惟青口繞漏病權最大奏請試行設口徵收補還漏課當經戶部議駁現在該監督以淮關漏課幾成積重難返之勢雖據稱水荒災歉南北商貨滯銷總在該監督體察情形設法整頓實力稽查將各種弊端逐一剔除總期便民順商於權稅自大有裨益並著陶澍林則徐會同明倫熟商妥辦嚴密稽查以期關稅日有起色毋許藉詞漏課辦理稍有不善致干咎戾○十七年



諭。鄧廷楨等奏請復承商舊例一摺。粵東洋商自嘉慶年間設立總商經理。其選充新商。責令總散各商聯名保結。後因夷船日多。行戶日少。照料難周。易滋弊竇。是以量為變通。准以殷戶自請充商。暫行試辦。停止聯名保結之例。茲據該督等查明。現在招補缺商。已復舊額。足敷辦公。自應仍復舊例。以示限制。嗣後該商遇有歇業。或緣事黜退者。方准隨時招補。此外不得無故添設一商。亦不必限年試辦。以歸覈實。其承商之時。責令通關總散各商。公同慎選。殷實公正之人。聯名保結。專案咨部著充。並著該督等隨時查

察母許該總商等仍蹈從前推諉壟斷惡習俾保充者務求覈實而走私漏稅諸弊亦責有攸歸以裕課餉而杜姦私○又

諭

給事中沈鏞奏請嚴禁各門稅口藉端需索擾累一摺各城門稅口應稅貨物自有一定則例此外不准絲毫藉端需索若如該給事中所奏近來各門稅口於尋常行李任意勒索錢文更有不肖營兵及無賴匪徒冒充差役攔阻訛詐實為行旅之害而右安門為尤甚似此擾累不可不嚴行查辦若僅交該監督及步軍統領衙門查究並責成該都司查拏恐層層

蒙蔽仍不免有名無實。崇文門總局本派有御史二員專司稽查。其內外十三門稅口。巡城各科道。本有稽查之責。嗣後著即責成該城科道分段認真密訪。嚴查。儻有前項情弊。即時叅奏。嚴加懲辦。以肅門禁。而安行旅。○咸豐二年

諭崇文門徵收貨稅。向以茶酒煙布為大宗。近來酒稅日見虧短。總因姦商雇覓貧民私運私背。囤積隱賣。漏稅日多。則正稅日少。著步軍統領衙門。順天府。將販運私酒各匪犯。隨時一體查拏。奏明懲辦。至崇文門徵稅口岸。向例在盧溝橋東壩板橋海淀設役巡

查道光十三年並二十三年復於密雲縣之穆家峪石匣順義縣之半壁店各地方添設稅局派員稽查既有定例口岸該商等自不容繞道巧避差役人等亦不得越境私掣致滋流弊著崇文門監督遵照定例實力整頓隨時稽查○九年

諭。鴻祖奏。掣獲漏稅洋藥。請旨懲辦一摺。據稱二月十九日。有草船夾帶洋藥過關。起獲三千八百餘斤。按每百斤徵稅銀三十兩。覈計該銀一千一百餘兩。等語。洋藥甫經定章徵稅。該商販等即敢公然偷漏。若不嚴行究治。無以儆姦商而重國課。所有掣獲之成。

開楊維忠二名。著何桂清等飭令淮安府知府嚴行  
訊究。查明各商販按名拏辦。所獲洋藥暫存淮安關  
庫。此項洋藥係由蘇州販運而來。其經過許墅由插  
揚州等關。何以該監督毫無覺察。任令偷漏。難保無  
丁役得賄私縱情弊。著該督撫查明參奏。○十年

諭杭州北新關為商賈往來要道。稅課有常。豈容胥役  
家丁恣意訛詐。著該關監督嚴密稽查。將過關五日  
十日之限。一概刪除。其零星貨物。仍照定例。不過三  
分者。概予免稅。以便商民。經此次明定章程之後。如  
再有重徵併計藉端訛索等弊。除書役家人從重治

罪外朕必將該監督嚴加懲處。○同治三年

諭左宗棠奏請將北新關暫緩開設按月由釐捐酌撥

以抵關稅一摺據稱浙省疊遭兵燹彫敝不堪北新  
關試辦已逾三月徵數寥寥實因關書巡役等向來  
視為利藪一經設關故態復萌藉端刁索以致商民  
視為畏途裹足不前請將關稅暫停以順輿情等語  
所奏切中地方利弊浙省蹂躪已深正宜休養生息  
以培元氣若任令關書巡役人等擅作威福肆意誅  
求於國課毫無裨益而閭閻苦累甚深殊非體恤商  
賈之道著恆延將北新關暫緩開設關口各稅一概

暫停抽收。毋得任聽關書等恣恣別生枝節。○四年  
議准。登州牛莊兩處豆貨。並奉天等處雜糧米  
穀。准內地商船與北洋油豆餅一律販運。○五  
年

諭。蔣益澧奏查明太平關稅務積弊。請裁撤書吏家丁。  
派員幫辦。並將巡撫等衙門陋規全數革除一摺。所  
辦甚屬認真。著照該撫所請。所有經徵太平關稅務  
之家丁書吏。永遠裁革。由該撫派委廉能之員幫同  
南韶連道管理。其巡撫衙門月費等項。並文武各衙  
門規費。南韶連鎮總兵薪水。均著一併裁撤歸公。試

辦一年再由該撫察看情形酌定章程奏明辦理經  
此次整頓之後儻有巧立名目暗中侵蝕等弊並著  
該撫嚴行叅辦此外各省關務均著該管督撫監督  
等實心清楚務令積弊悉除稅課日有起色毋得復  
蹈故轍任意虧短致干重咎○又

諭前據戶部議覆左宗棠奏粵海關收稅銀數與該關  
奏報懸殊請飭該督撫查明辦理一摺當經諭令瑞  
麟等查議具奏茲據瑞麟蔣益澧奏稱粵海關收稅  
事宜從前曾改隸將軍督撫等官經理自乾隆十五  
年以後始專設監督著為成例未易輕議更張至該



關額徵總數。從前貨物歸併一口。不及九十萬兩。近來五口通商。每年徵稅總及百萬兩。但能嚴查偷漏。隱匿等弊。稅務自可日有起色。體察目前事勢。似不必改由督撫辦理等語。所奏自係實在情形。粵海關稅務較繁。該監督持庸簡任。宜如何激發天良。力圖報效。乃家丁蒙蔽。書役侵吞。積弊相沿。較他處為尤甚。若不極力整頓。涓滴歸公。稅課安有起色。著該監督嚴行鈐束。力禁侵漁。查明各口收數。覈實清釐。不得稍有隱漏。並著該省督撫隨時明查暗訪。如仍有書吏家丁通同舞弊。該監督以多報少情事。即著據

實嚴叅從重懲辦此外各關監督及兼管關稅之督撫均須認真稽覈釐剔弊竇毋得仍蹈從前積習稍涉含混○六年

諭候補內閣侍讀學士鍾佩賢奏請嚴禁崇文門稅局需索一摺崇文門設立稅局該監督等自應督飭委員按例徵收不准絲毫妄取若如鍾佩賢所奏近年以來每於稅課之外需索銀兩近日會試士子進京亦有勒索銀十餘兩及四五兩不等並各城門官役先索多金方許送務等情是稅局需索例禁雖嚴該官役人等仍敢任意妄取苛及行旅朝廷培養士子

體恤惟恐不周。該官役竟敢違例婪索。尤屬可惡。不可不嚴行禁止。著該監督等申明定例。嚴飭官吏巡役人等。凡遇送務車輛。止有行李。並無貨物者。立予查驗放行。如有留難勒捐情弊。即著查明懲辦。並嚴禁報效名目。各城門官役。訛索銀兩。即著一體禁止。毋稍徇縱。○八年

諭嗣後解京貢物及承解官物者。著戶部傳知各關差織造等。遵照舊章。報明崇文門稅務衙門放行。毋許稍有留難。僮查有吏胥差役人等藉端勒索。即著該監督從嚴懲辦。管解委員亦不得藉貢差為名夾帶。

私貨希圖偷漏以重稅課○九年

諭丁日昌奏本年夏秋間江蘇各屬應試諸生多有包帶私貨聯檣闖關請旨嚴禁等語私貨本干例禁闖關抗稅尤為法所必懲且三載賓興檢才大典該士子身列膠庠即備他日賢良之選宜如何束身自愛整飭廉隅若如所奏白串牙商包攬客貨恃眾抗稅惟利是圖非特稅課有虧實為士林之玷著該督撫剴切曉諭嚴行禁止嗣後鄉會試文武舉貢生監人等赴京赴省應試概不准包攬客貨私鹽等項儻仍敢故違例禁闖關抗稅即著嚴密查拏先將士子扣

考船戶嚴懲照例分別究辦以端士習而重國課該督撫即將此諭勒石河干永為定例○又

諭御史劉國光奏請飭嚴禁各關稅衙門留難需索等語前據丁日昌奏本年江蘇應試諸生闖關抗稅當降旨嗣後鄉會試文武舉貢生監人等赴京赴省應試概不准包攬客貨私鹽等項原因不肖士子藉考漁利不得不嚴行查禁但恐該吏役等假公濟私於該士子所過關津釐卡皆以查稅為名藉端訛詐指無為有需索不遂任意留難致令各士子沿途節節阻滯貽誤場期殊失朝廷優待士林之意著各省督

撫嚴諭各關卡官員。凡鄉會試文武舉貢生監人等。除有白串牙商包攬客貨恃衆抗稅情事。仍應查辦外。其照例隨帶衣箱食物等件。該吏役等不得任意留難。如有需索情弊。准該士子赴該管衙門呈訴。將該吏役等從重懲辦。如該管官有意袒護。並著該督撫一併查叅。其尋常來往之人。如無夾帶貨物。亦應迅速放行。不得藉端留難。以安行旅。○又

諭御史馬相如奏請嚴禁巡役藉端訛索等弊一摺。右翼監督徵收西山牲稅。自應遵照定章辦理。若如該御史所奏巡役橫徵苛索。於起票銷票換票肆行勒

費。甚至徵多報少。種種弊端。不可枚舉。亟應嚴行禁革。著該監督除將此項巡役從嚴約束外。將稅則定章出示曉諭。並刊刻新票。以及換票銷票。明定期限。不准官役勒索使費。以安商民。而除積弊。○十年

諭。淮安關監督舒麟奏。運鈔委員欠繳銀兩。請飭追繳等語。江蘇解運京鉛。行抵淮安大關。經舒麟照例查驗。該委員抗不遵照。其單開木植等貨。應納淮宿二關正稅及船料等銀七百十四兩零。亦未完交。稅課自有定章。豈容任意延宕。著兩江總督督飭藩司勒令該委員等。將欠繳稅銀如數完繳。毋許抗欠。嗣後

各省運解官物。若有多餘及別項貨物。務令遵例。即時納稅。船料一項。並令船戶完納。倘再違抗。即由監督查明奏參。以重稅課而儆效尤。○光緒三年

諭鄉會試士子入都。如有夾帶私貨。原應查察。若止隨帶行李。並無貨物者。自當隨時驗明放行。不得稍有留難。第恐各門差役。於車輛進城。或故意攔阻。藉端勒索。及至到務後。又不立時查驗。致受延阻之累。種種弊端。不可不嚴行禁止。著崇文門監督嚴飭該官役等。凡遇應試士子車輛送務後。隨到隨驗。迅速放行。如查有需索留難等弊。即行從



重懲辦。毋稍寬縱。儻該士子等不知自愛。夾帶私  
條。一經驗出。仍著照例辦理。